

Dimenche 1 de Jun 1879.


Iro Anado. – N° V.

Dimenche 1 de Jun 1879.

Dous Sòu lou Numerò.

I^e Anado. — N° V.

LOU



BRUS

JOURNAU POUPULARI DE LITERATURO, D'ISTORI E DE SCIENCI
PAREISSÈNT TOUTEI LEI QUINGENADO

Se vende pèrtout. Depausitari majourau pèr Marseiho: J. VINCENT, kiosque 17, à la Plano.

Abounamen :
3 fr. e mié pèr an pèr touto lâ Franço.
Fouero Franco, lou port en sobre, çò
que reven à 5 fr.

Tout çò que toco lou journau dèu
èstre manda afranqui à l'Empremarié
Prouvençalo, 45, carrièro dòu Grand-
Relògi, à-z-Ais.

Lei plé noun afranqui saran refusa.
Leis article noun inseri saran pas
rendu.

TAULETO

PASSO-TEMS. – Un maïro suspendu. – *Un Bastidan.*

POUESIO. – Lord Brougham e Cano. – *C. G. Bonaparte-Wyse.*

REMEMBRANÇO. – Dóu 1 au 14 de Jun. *L. A. Gardaire.*

CROUNICO. – Santo-Estello en Avignoun em'à Paris.

– Discours d'En F. Mistral.

– Mount-Pelié.

– Cano. – *La Redacien.*

ISTORI. – Bras. – *L. Vitou.*

SCIENCI. – Botanico. – *Zèno.*

NECROULOUNGIO. – M. lou Marqués de Saporta. – *F. d'E.*

TEATRE PROUVENÇAU. – Tres galino pèr un gau. – *M. Bourrelly.*

LOU PEDOUN.

FUEIETOUN. – La Chato di pèu d'or. – *Magali.*

— — —

PASSO-TEMS

UN MAIRO SUSPENDU

Dins un vilàgi retira dis Basseis-Aup, un maïro avié agu la malo chabènço de desagrada à soun prefèt, que manquè pas, un bèu jour, de prène aquest arresta :

Nous, etc.

Considérant, etc., etc.

Arrêtons :

Art. 1. – Le maire de X..., sera suspendu de ses fonctions pendant un mois.

Art. 2. – L'adjoint est chargé de l'exécution du présent arrêté. "

Eiçò faguè grand chamatan dins l'endrè; mai lou mai entrepacha siguè l'ajoun, carga de l'eisecucion de l'arresta, e en quau lou prefèt recoumandavo demai de lou teni au courrènt de ço que se passarié.

Noueste paure ajoun n'avié perdu la souem e l'apetìs. Va counfisa soun emboui à dous vo tres de sei coulègo dóu counsèu, e à forço de travaia de tèsto, arrèston un plan e fisson lou jour ounte, lou counsèu municipau acampa, se metr'à-n'eisecucion l'arresta de moussu lou prefèt.

La sesiho dubèrto, e moussu lou maïro asseta subre lou sèti de la presidènci, l'ajoun s'aubouro, e, d'un serious de papo, fa leituro de l'arresta dóu prefèt. Pièi, sus d'un signe counvengu, quatre counsèié municipau, enviróuton lou sèti dóu maïro, fan descèndre dóu caraman un long triau, l'estacon èi quatre pèd dóu sèti, e vague de saia lou maïro, e de lou teni en l'èr; pèr precouncien, l'avien estaca au sèti. E leveron la sesiho.

L'ajoun aguè rèn de mai apreissa que de rendre comte au prefèt coumo tout s'èro passa. En finissènt sa letro, li demandavo pamens un counsèu :

" Avèn bèn fa ço qu'avès coumanda ; noueste maïro es bèn suspendu pèr un mes. Mai pamens, quouro aura besoun de... coumo pouedi dire ?... escusas... de faire quicon... poudren pas lou descendre ? "

En legissènt eiço, lou prefèt aguè doutanço de quauque tour de nèsci. Mandè lèu un counsèié de prefeturo. Arribè tout-à-tèms pèr despendoula lou paure maïro qu'acoumençav'à n'avé besoun.

UN BASTIDAN.

— — —

N° 5 FUEIETOUN DOU BRUS

CONTE DE MESTE AMBROI

LA CHATO DI PEU D'OR

En Arles au tèms di fado. (F. M.)

Alor, agantant la grand sieto, s'alando e dóu fum – dóu prefum vole dire – que s'eisalo de la sauço e de la bèsti, Belàsti n'es agouloupa, e lou sabouro à plen pitre. La tentacioun lou tourno pougne. L'envejo lou pren mai de ie trempa lou det. Em'acò, quau vous a pas di qu'en travessant contro la porto dóu jardin, tout just au moumen que, se cresènt soulet, ie vai manda la man, si cambo ie flaquisson e cujo leissa toumba ço que porto ; uno voues enrauquesido trai aquest crid dins l'espaci :

— Ounte anaren ? — Ounte se pausaren ?

E uno autre voues ie respond :

— Dins li pesquié dóu Rèi.

Belàsti aubouro lis iue dóu caire d'ounte vèn la voues, e vèi, sus la fenèstro dóu pati que douno jour à l'escalié, uno auco que se i'es pausado ; e pièi, dins lis aire, eilamount, apereilamount, un vòu espetaclous d'aquèli bestiari blanquinèu, alo desplegado e fourmant triangle.

Alor, coume sourtent d'un pantai, li nivo de sa cabesso s'estrasson, ie touumbo deis iue coume dous cruvèu de muscle e, durbènt li ciho, s'escrido :

— Bèu segnour Diéu, vous rènde gràci, aro es bèn vertadié que counèisse la vertu d'aquelo meno de pèis que lou rèi voulié manja sènsa que res autre n'en tastesse. Ço que n'èi di causo pamens ! ah ! jour de Diéu, queto chabènço ! — Belàsti, Belàsti, sies dins la draio de la fourtuno. E de la pòu e dis esglàri, passant tout d'un cop dins la joio la plus grando, aguènt pas mai cregnènço de la mort e dóu boio que de l'iro de Rousau, Belàsti — que saup de soubro que fin contro fin fai marrido doubluro — countènt coume un targaire qu'a gagna li joio, e urous bèucop mai que tóuti li rèi e prince de la terro, jito un regard sublime sus la bèsti d'ounte i'es vengu lou secret d'entendre lou lengage dis animau, ie fai un poutoun pèr gramaci sus lou mourre, e se mandant un cop de poun sus lou froun coume pèr i'embarra si pensado e cour à touto zurto vers lou saloun reiau. Arribo, que just lou rèi despacienta mandavo la man à sa campaneto ; e Belàsti, noun sènsa n'agué tasta un brisounet mai, ie presento la menèstro qu'èro tant bèn amagestrado.

(A segui.)

MAGALI.

— — —

CROUNICO

SANTO ESTELLO

SESIHO ANALO, TENGUDO EN AVIGNOUN

Lou 22 de Mai 1879.

L'evenimen de la quingenado es esta la fèsto de Santo Estello e l'acamp dóu felibrige en Avignoun.

Se saup lei malamagno, lei travesso, leis encagnamen d'aquelo soucieta foundado pèr d'autrei toco e que d'esperit verinous avien emplido de fèu e de coumbour.

Sian urous de lou dire dessuito : tout se li es bèn, tout se li es amirablamen passa, milo còp miés que çò que s'esperavo e que çò que aurien vougu quauquei sòci aigre e respignous.

Dins lou Counsistòri acampa, unioun e fraternita couralo. Aubanèu e Roumaniho, emé l'aplaudimen universau, se demetènt de sei founcioun de Sendi e d'Assessor de Prouvènço e declarant d'avanço refusa tutto nouvello nouminacioun ; l'assemblado unenco à lei felicita d'aquéu noble desinteressamen, e F. Mistral, en sa qualita de Capoulié, lei benastrugant tout esmóugu, lei gramaciant de cor e li fasènt coumplimen de la façoun que s'èron coumpourta, atrouvas pas qu'acò's bèu, qu'acò's grand, qu'acò's acourajant e que desdòumajo un pau qu'aquelei marri jour, ounte un vènt de malur butavo la nau felibreno sus leis estèu e emplissié d'aurige e de brefounié sei velo fino e blanquinello ?

Ounour à Roumaniho ! Ounour à-n-Aubanèu ! Se n'èron pas nosti moudèle, acò bastariè à lei rendre. Basto sei suscessour se molon aqui dessus !

Veici lou resultat dei nouminacioun :

- CAPOULIE dóu Felibrige, à l'unanimeta ; En F. Mistral ;
- CANCELIE dóu Felibrige : En Vitour Liéutaud, felibre majourau ;
- ASSESSOUR de Prouvènço : N'Ansèume Matiéu, l'autour de la *Farandoulo* :
- SENDI de Prouvènço : En Marius Bourrelly, neste coulabouraire e déjà Vice-Sendi, lou veteran dei letro prouvençalo, l'ounour de l'escolo marsiheso, en quau soun predecessor Aubanèu a couralamen sarra la man.

L'endeman, jour de l'Ascensien, fèsto de Santo Estello, fèsto couralo, fèsto enlusidi pèr l'amista e l'unioun de tòuti li cor.

Foro dei felibre majourau déjà nouma, li avié leis autre : Gras, Tavan, Brunet, Roumiéu ; - pièi lei felibre mantenèire forço noumbrous que pouden pas tòutei nouma. Citen soulamen : Monné, de l'escolo felibreno de l'Aubo ; Huot, de l'escolo de la Mar ; d'Ermitànis, Maurin e Descosso, de l'escolo deis Aup ; Boy, dei felibre de Lyon ; O'Byrne, representant la mantenènça d'Aquitàni ; Delille dei felibre de Paris ; Lèbre, de l'escolo de Lar ; Girard, cabiscòu dóu Flourege ; Legié de Mesteyme, dei Prouvençalisto d'Ate ; Friset ; Grinda ; Astruc ; que a noblamen repara lei tort que poudié avé envers quauquei sòci ; Mouzin ; Gleizo ; etc. ; etc.

Aro, quau poudié redire lei brinde de la Coupo, e la vesprado deliciouso que tant de cor uni e ami an passa ensem dins la vièio salo dóu Tèmple ? Pas lou paure pichot *Brus* tant estret, pecaire, e tant court ! Signalen soulamen lou discours simple e courau dóu Capoulié, que nostei legèire atrouvaran eicito après ; lou brinde court e aut de Roumaniho e de Matiéu.

Roumaniho a di :

Brinde à l'amour que purifico tout, e pacifico ; brinde perèu à Clemènço Isauro e à neste valènt Capoulié que vèn de nous counquista glouriousamen si boni graci !

Matiéu a di :

Brinde à la jouvènço car es elo l'aveni, que siegue sèmpre la forço e l'ounour !

Aubanèu a debita uno pèço de vers coumo lei saup faire e que regretan de pas pousque publica ; e, fau que lou diguen, èro un grand plasé pèr tòutei leis iuei e pèr tòutei leis auriho de veire e d'ausi Roumaniho aplaudi lei vers d'Aubanèu e Aubanèu aplaudi lou brinde de Roumaniho.

Esmóugu mai que mai pèr lou discours de Mistrau, mai que d'un a ploura coumo lou capoulié de bonur e de regounfle. Tambèn l'emoucioun dei nouvèu coume O'Byrne, Boy, Grinda, etc., es-ti pas estado estounanto e tòuti l'an partejado.

Carle Descosso de Fourcauquié a ansinto brinda à la Coupo :

A tu brinde, Coupo santo,
Tu que largues l'estrambord ;
Emé tu, lou cor s'encanto,
Quand t'escampes dins li cor.

Davans tu, l'amo s'espanto
Quand amiro sus ti bord
Toun jus pur ; oh ! alors canto
Li mai sublimis acord.

Fai sèmpre nòsti delice,
E que jamai li caprice
Desverdegon ti ramèu,

Que cado de ti raiado
Siègue uno tièro anelado :
Nòsti cor saran l'anèu !

Tavan a brinda à *l'amour sèns fin de la famiho felibrenco*. – Huot, ei tres capoulié Mistral, Aubanèu, Roumaniho, brinde que tóuti aurieu vougu faire à sa plaço. – Mounè, à l'unioun, au respèt, à l'amour, dins lei tres galanteis estrofo que veicito :

Coume de fraire
Menant l'araire
Dins uno eterno e santo unioun
Bèvon tòutis en coumunioun :
Bève à l'unioun !

Quand l'oustalado
S'es amourrado
Au sourgènt d'espèro e de fè,
Li jouine i vièi porton respèt :
Bève au respèt !

E pèr la vido
E si caussido,
Pèr l'amareesso e pèr li plour,
Alor i'a lou baume d'amour :
Bève à l'amour !

Bourrelly, au respèt que lei jouine dèvon avé pèr lei vièi veteran. – I. Lèbre, au respèt dei traditien, dei crèire, de la lengo, dins'questei vers boulegarèu :

Au festenau de Santo Estello
Permèi d'ilustre Counvida,
A la taulado subrebello
Sièu fièr de veni m'assetta...
O santo Coupo Catalano
Quet emoucioun à toun aspèt !
De bonur moun amo tresano
E de respèt.

Queto es l'ouro que nous acampo
D'eici, d'eila, d'avau, d'amount,
Coume, quand boufo, la cisampo
Buto lei fueio en un mouloun ?
Ni pèr plesi ni pèr afaire
Vuei d'ouro sian esta sus pèd ;
Ço que nous adus de tout caire
Es lou respèt.

Dóu noble païs de Prouvènço
Sian, nautre, lis enfant pious ;
Si triounfle o sa descasènço
Nous fan lou cor triste o jouious.

De si tradicioun, de si crèire,
De sis espèr, de si souvèt,
De sa lengo, sian mantenèire
Emé respèt.

Lou respèt sus aquesto terro
Es la grand clau que tèn tout dré ;
Es l'amo di nacioun prouspèro,
Es la foundamento dòu Dré.
Es, de l'estrambord dòu troubaire,
Un di sourgènt li plus escrèt :
Adounc, Messiés e gai Counfraire,
Brinde : Au Respèt !

N'en aurian pèr jusqu'à deman se noun s'arrestavian, en pregant lei felibre óublida de nous perdouna en vesènt lou pau de large qu'avèn.

Pièi la depacho dei felibre de Paris : Glèizo, Bauquié, Bonnet, Duc, Folleville, etc. – dei felibre de Marsiho pèr A ? Chailan ; - dei felibre de-z-Ais pèr Ip. Guillibert, etc.

Enfin, de longtèms se veira rèn de mai courau qu'acò, e aquelo sesiho es estado ei macaduro dòu felibrige lou baume que garis definitivamen de tout mau.

— — —

Discours de F. MISTRAL, capoulié dòu Felibrige, à l'acamp de Santo Estello, lou 22 de mai 1879.

Messiés e gai counfraire,

Eiçò fai li tres an que lou Felibrige viéu segound la lei que s'es dounado en 1876. L'encauso de l'estatut èro de reüni en cors leis esperit divers que, de près o de liuen, s'interèsson au sauvamen e au relevamen de nosto lengo nourriguiero. Es ansin que vesèn s'agroupa dins lou mounde aquèli que proufèsson uno memo cresènço, o uno memo óupinioun, o bèn lou meme goust pèr l'enantimen d'uno sciènci. Es ansin que vesèn se coungreia e prouspera de soucieta d'agriculturo, d'arqueoulougìo, de geougrafio, de tutto branco d'estrucioun, sènsou coumta lis acadèmi que flourisson un pau pertout. Ero dounc facile à vèire qu'en acampant nòsti forço e qu'en ourganisant nòsti noumbrous roudelet, sarian mies en mesuro d'espandi nosto idèio e de nous apara. Eisaminen adounc se, desempièi tres an, l'idèio felibrenco a gagna de païs.

Messiés e gai counfraire, se voulès un moumen vous auboura 'mé iéu au-dessus di treboulino qu'an nebla quauque tèms li rai de Santo Estello, sarès urous de recounèisse que lou reviéure de la lengo a pres d'alo mai-que-mai.

La terro de Prouvènço, qu'es stato long-tèms l'unico buto de noste ambicioun, nous apartèn, poudèn lou dire, touto entiero. Dins tóuti nòsti vilò, Avignoun, Arle, At, Carpentras e Seloun, Ais, Marsiho e Touloun, Fourquauquié, Cano e Niço, lou parla prouvençau es venera e cultiva, e noun i'a ges vuei de grand festo, sènsou que se i'óufrigue uno plaço d'ounour.

Lou Lengadò peréu ardentamen s'es mes à l'obro. E dins si vilò principalo, Nimes, Alès, Beziés, Mount-pelié, Carcassouno, Castèu-nòu-d'Ari e Toulouso, avèn d'ome de bon que tènon auto la bandiero e que luchon fieramen pèr lou triounfle de la causo.

Mount-pelié, entre tóuti, es devengu lou cèntru dis estudi roumano. Uno grando revisto, legido à l'ouro d'uei dins touto l'Europo, ie coungreio e boulego li travai sus lou lengage ; un tiatre

poupoplari ie jogo la coumèdi e lou dramo felibren ; enfin un majourau de noste Counsistòri, En Camihe Chabanèu, ie fai publicamen, óuficialamen, un cours de prouvençau. Es pas besoun que vous remembre la realisacioun d'aquèli *Fèsto latino* ounte lou Felibrige s'es revela tant pouderous.

Vous ai nouma Toulouso.

Enjusqu'aro, Messiés, aquelo ilustro vilo, tant celèbro dins l'istòri de nostro raço d'O, semblavo inatentivo à nosto boulegado, e veici que tout-d'un-cop sa glouriouso acadèmi nous a dubert si porto à brand. E se vous parle, iéu, d'aquelo grand vitòri, emai ie siegue en part ma persounalita, es dóumaci, Messiés, que voste Felibrige, en aquelo pountannado, a reçaupu enfin sa counsacracioun soulenco dins la ciéuta d'Isauro e di comte Ramoun. Car veici li paraulo dòu président de l'Acadèmi :

“ L'académie des Jeux Floraux ouvre ses rangs, non pas seulement à l'auteur de *Mireille* de *Calendal* et des *Isclo d'or*, mais encore au chef de ces Félibres qui, par vous et avec vous, ont conçu la pensée de soumettre à l'unité d'une langue renouvelée tous ces vstes espaces qui séparent les Alpes des Pyrénées, et où régnaien jadis les ducs d'Aquitaine, les comtes d'Auvergne, de Rodez, de Vienne, de Toulouse et de Provence. ”

Vesès dounc que l'idèio es coumpresso pèr quau fau e afourtido mounte fau.

Perqué sian à Toulouso, vous farai tambèn assaupre que la Mantenèço d'Aquitàni se i'es brihantamen inagurado, e qu'avèn coustata, dins la sesiho d'uberturo, uno fogo felibrenc que proumet d'aquéu caire un superbe espandimen. Saubrès de mai que mounsen l'abat Couturo, un autre majourau de nosto soucieta, fai foulò de-countùnio à l'universita d'aquelo vilo en proufessant l'ensignamen di letro prouvençalo.

Messiés e gai counfraire, avès tòuti après pèr li raconte di journau la magnifico fèsto que la *Cigalo* de Paris a dounado au Felibrige. Aquel óumage d'amistanço e d'estimo e d'ounour rendu à nosto soucieta, au mitan di merveihò de la darriero espousicioun, amerito de nosto part un flame gramaci. E la presènci dòu menistre de l'estrucioun publico, l'ounourable M. Bardoux, emé li distincioun decernido pèr éu à dous de nòsti counfraire, demostron autamen la counsideracioun que vous sias, entre tòuti, acampado bèn liuen, en conquistant leialamen vosto liberta literàri.

Au noumbre di counvivo dòu festin de la *Cigalo* figuravo M. Saint-René Taillandier, un de nòsti premié, un de nòsti meiours ami, que desempièi es mort.

L'acamp de Santo Estello saludo vuei en grand respèt lou noum ilustre d'aquéu sòci, car siguè matinié pèr veni à nosto ajudo, car siguè calourènt en parlant de nosto lengo ; e se, pèr tout lou mounde, s'óucupon vuei dòu Felibrige, es gràci majamen à l'elouquenci e à l'autourita de sa critico.

Aro, pèr acaba, fau pamens dire un mot d'aquéli bourascado que, au courrènt de l'an, an esprouva la nau que nous barquejo.

Quand noste fin barquet davalavo plan-plan au fiéu dòu Rose, lou pichot equipage poudiè jaire tranquile sus lou tèume ; la ribo èro pas liuencho, e erian au mes de mai.

Mai vuei que navegan en pleno mar, vuei que lou Felibrige espandis soun acioun dins tòuti li prouvinço de noste ancian empèri, vuei que li Limousin, lis Aquitan, li Catalan bevon emé nous-autre à la coupo sacrado, vuei que sian plus ni sèt, ni quatorge, ni cinquanto, mai uno armado entiero atravalido à l'obro santo, de que i'a d'estounant que nous turten en quauque estèu, que travessen quauqui chavano, e que li mescresènt, en vesènt noste eissame belugueja dins lou soulèu, nous bandigon de pousso pèr nous espavourdi e nous coupa lou vanc !

Messiés, la pousso touumbo, e l'eissame s'envolo mounte lou vòu pourta l'alen de Diéu !

Aguen fisanço à Santo Estello ! em'i sèt rai de Sant Estello !

Messiés, fuguen d'accord, e sarren-nous que mai dins l'amour de la lengo, qu'es l'amour dòu païs, qu'es l'amour de la Franço, lou beritable amour de la Franço poupoplari !

E se quauque mau-pensant, en vesènt flameja lis ardour felibrenc, sounavo mai lou toco-san, Messiés, rapelen-nous lou refrin de Saboly :

*E leissen dounc, e leissen dounc li causo vano !
E que nòsti cor
Sonon plus fort
Que tóuti li campano !*

La veih de l'Ascenciou, lei Prouvençau acampa dins Paris an festeja perèu Santo Estello, encò de l'oste Martin (dou Var). An brinda à la Prouvènço, à la Franço, à l'unioun de tóuti li cor, e, coume l'avèn déjà di, an manda soun brinde à la taulado d'Avignoun.

Longo-mai à la boueno salut !

Fauto d'espai, remandan au numerò venènt l'insercien d'une galanto pèço dòu valènt felibre A. Arnavielo, mandado à-n-aquelo óucasien ei felibre de Paris.

MOUNT-PELIE. – Lou 25 de mai, la Mantenènço de Lengadò a tengu soun assemblado generalo. A-n-aquelo óucasien s'es douna sus lou grand teàtre Mount-pelierenc uno serado tutto lengadouciano. M. Cartagi, ancian ministre de Roumanò, èro d'aquelo felibrejado.

CANO. – Pèr èstre crounicaire vertadié, devèn redreissa ‘no bourdo que nous esquihè dins nosto radiero crounico. La vilo de Cano a festeja lou centenàri de la naissènço de lord Brougham e noun de l'aniversari dòu jour ounte venguè à Cano, iverna e basti un oustau. Cadun saup que l'ia d'acò qu'uno quaranteno d'an. Lei gènt d'à-z-Ais, e majimen lei que fan d'abitudo la radasso au cagnar de la *griho de fèrri*, se remembron quouro avans l'espandimen dei camin de ferri, passavon coumo de tourdre leis anglés e establavon à *l'Hôtel des princes*. Un jour, subre tout, l'iagué de tris entre lei flanaire. Un paréu de *chaiso de posto* debouchavon à ventre-terro dòu coups dei Menime dins un niéu de pousso. Tóutei lei badaire s'arrangueireron pèr veire quau anavo sourti d'aqui. Sigueron bèn espanta quouro n'en vegueron descendre uno troupelado de magnifique can de casso (avien rèn de coummun emé lei de la cavaucado de Marsiho), mestreja pèr de *groom* en lieurèio. Ero lei can que lord Brougham fasié veni d'Anglo-terro pèr cassa dins lei couelo de Cano.

— — —

REMEMBRANÇO

(57) 1 de Jun 1864. – Mouert, à-z-Ais de Batistin Poujoulat, autour de meriti que publiqué, en 1840, douz voulume : *Voyage dans l'Asie-Mineure, en Mésopotamie, à Palmyre et en Egypte* ; en 1861 : *La vérité sur la Syrie et l'expédition française* ; en 1862 : *Histoire des papes depuis Saint Pierre jusqu'à la formation du pouvoir temporel*. Ero nascu à La Faro lou 11 de novèmbre 1809.

(58) 2 de Jun 1809. – Naissènço, à Draguignan, de Jan-Pèire Clement, istourian e economisto, que publiqué, de 1846 à 1866, uno déseno d'oubragi d'uno grando valour. Siguè courouna pèr l'Acadèmi franceso e óutengué lou segound prés Gobert. Mourè à Paris, membre de l'Institut, lou 3 de novèmbre 1870.

(59) 3 de Jun 1861. – Mouert, à Marsiho, de Louis Albe, mairo d'aquelo vilo en 1848. Ero ancian escoulan dòu coulègi de Sourèzo e eisersavo la proufessien d'avoua.

(60) 4 de Jun 1734. – Mouert, à-z-Ais, de Francès Décormis, juriscounslt renoumena.

(61) 5 de Jun 1864. – Inaguracién dòu nouvèu santuàri de Nosto-Damo-de-la-Gàrdi, à Marsiho.

(62) 6 de Jun 1766. – Naissènço, à-z-Ais, de J.-B. Aleissandre marques de Panisso, chivalié de Saint-Louis e de l'ordre de Malto. Avié countribui à redreissa e decoura la glèiso de Lamanoun, mounte mourè au mes d'avoust 1858.

(63) 7 de Jun 1840. – Mouert, à Marsiho, de Louis-Danis Gregóri, fiéu de Gaspard Gregóri, poueto prouvençau e autour de : *Explications et cérémonies de la Fête-Dieu d'Aix*.

(64) *8 de Jun 1785.* – Mouert, dins lei presoun de Limoério (Pourtugau), dóu presidènt d'Entrecastèu, soutu l'escai-noum de chivalié de Barau que, l'an d'en davans, avié sagata, à-z-Ais, sa fremo dins soun lié.

(65) *9 de Jun 1859.* – Mouert, à Paris, de Marie Aycard, journalisto, vaudevilsto e roumancié. Ero nascu à Marsiho lou 9 de novèmbre 1794.

(66) *10 de Jun 1807.* – Dins la vesprado, la princesso Paulino, souerre de Bonaparte, qu'èro desempièi 7 à 8 jour à la Mignardo, pròchi de-z-Ais, va au rescontre de soun ome, lou prince Borghèse. S'arrambèron entre Meirargo e Venèlo. Se dis que la princesso avié pres de lougatié qu'avien lou presfa, emé de longueis acanadouiro, lou jour, de coucha lei cigalo e la nue de faire parti lei grapaud e lei raneto que dounavon sus lei nèr de la bello princesso.

(67) *11 de Jun 1863.* – Mouert à Marsiho dóu baroun Reinaud de Tres, ancian coumandant de la gàrdi naciounalo en 1814 e deputa de Marsiho en 1815. Ero dins sei 84 an.

(68) *12 de Jun 1692.* – Mouert de Nourat Burlo counsié à la senescaussado d'Ais, d'uno anciano famiho. A laissa d'obro proun marcanto sobre la Prouvènço d'antan.

(69) *13 de Jun 1839.* – Mouert à Lyon de Mounsegne d'Isoard, auditour de Roto, nouma à l'archevescat d'Auch.

(70)